



In chei agns lavôr no 'nd jere par nissun. Tant al è vêr che ducj i coscrits de classe di Gabriêl a jerin lâts vie pal mont. Lui, cun sô Mari vedue e sô sùr vedrane nol veve podût fâ come lôr. Di mistîr al faseve il sblancjin, ma colpe de miserie presint in dut il paîs, a part cualchi cjôt o gjalinâr, no lu clamave nissun. Cussì par cuistâsi il pan al faseve ancje il peleâr. Par chest lavôr al partive di vinars e di Sabide a buinore, par imbusâsi in ducj i curtîi indulà che al copave lis bestiis che dopo si metevin in padiele pe fieste che si faseve indenant.

Al jere bulo tal copâ i cunins, che a jerin lis bestiis che i permetevin di cjapâsi pardabon cualchi franc, vendint lis lôr piels sul marcjât dai peleârs.

Ma in chel an, colpe soledut de murie di chês bestiis, si e no che al podeve contâ sui dêts di une man i cunins copâts intun mês. Une dì, par chest, al jere cussì avilît che no savint plui a ce Sant avodâsi al jere lât a preâ tal cimitieri su la tombe di puare sô none.

Sacrament, subit dopo che al veve dit par jê cualchi recuie, si è sintût clamâ.

“Gabriel âstu voie di cjapâti un franc? Lu àn a pene metût sul taulaç de cjase mortuorum e jo ai di veglâlu par dute la gnot.”

“Il maressial dai carabinieri

al à subit zontât, mi à dât doi mil francs, e se tu, tu ti fermis cun me, di chescj, cinc cent tai doi a ti”

Al jere Plos il pizighet, che i dave la pussibilitât di metisi pardabon alc te sachete.

Si tratave di passâ la gnot cun lui a vuardiâ chel puaret, che dome tal doman cu le autopsie a varessin podût capî se si jere copât, se al jere muârt di frêt o se i jere vignût un colp.

Gabriêl mai plui tant content, ancje parcè che, fevelant, al veve alçât il so compens a vot cent francs, cu l'impegn che al sarès tornât jù lui tal paîs par comprâ un butilion di vin par bevi vie pe gnot.

Dit e fat, intun moment, al jere za rivât tal mieç dal paîs. Il probleme al jere dome che al veve tante sêt, e cun di plui al à cjatât un so vecjo amî. Cussì par une robe e chê altre al è tornât indaûr che si jere fat scûr.

Intant Plos, soledut par chê schene che cui dolôrs lu lambicave, al veve pensât di impisolâsi. Ma là podevial pognisi e slungjâ lis gjambis? Nissun probleme. In cuatri e cuatri vot, metût par tiere il muart che aromai, lui nol veve plui bisugne di nuie, si jere metût tal so puest.

Cussì distirât al stave tant ben che intun moment in chel cidinôr si je propit indurmidît. Al durmive cussì ben che dome la fuarte ciulade dal porton dal cimiteri lu veve sveât.

Al jere Gabriel che finalmentri al jere tornât indaûr.

“Plos Plos o soi jo, pie il lum che no viôt nuie e o riscj di inçopedâmi in cualchi tombe” al vosave Gabiel par fâsi sintî che al jere tornât.

A chês peraulis nissune

rispueste. Plos, par tant che al jere mataran, al veve pensât di fâi cjapâ un biel spac.

Cussì al à pensât di alçâsi di chel taulaç indulà che si jere distirât a pene che lui al ves vierte la puarte.

Cussì, Gabriêl viodint chê ombre che si alçave, nol varès che podût pensâ che al fos stât chel muart che si tirave sù dal taulaç di bessôl.

Dit e fat. Si veve alçât propit cuant che lui al jentrave.

La pôre che al veve cjapât il puar Gabriel, lassìn sta che si jere cagât tai bregons, no son peraulis par podê contâle.

Si sa dome che al à tacât a cori come un mat. Cui talons che i batevin tal cul al è scjampât vie pes campagnis fintremai che al è rivât tes palûts dal paîs, indulà che par fuarce di robis la sô corse si è fermade.

Pe pôre, oltri cjavei che di neris come il cjarbon che al veve i jerin diventât blancs al jere ancje lâf fûr di cjâf. Tant al è vèr che jenfri chês grandis busis di aghe ferme lu à cjatât dopo une setemane savoltât. E il butilion di vin ce fin aial fat?

Restât di bessôl, Plos, il pizighet, al à scugnût bevilu di bessôl. Nol varès mai credût che Gabriêl al cjapàs tante pôre dome par viodi un muart che si alçave in pîts.

**di Nello Malisano**